

G A R A M D A N T E R A N G D U N I A :
MERAYAKAN, MENDENGAR DAN BERJALAN BERSAMA DALAM SEMANGAT
PERSEKUTUAN, PENYERTAAN DAN MISI (MATIUS 5:13-16).

FOKUS BULANAN

MENINGATI MEREKA YANG MENDAHULUI KITA

Kasih Praktikal Adalah Inti Iman Kita



Bacaan pertama dari Ulangan mengingatkan kita tentang Shema (doa harian orang Yahudi):
"Dengarlah, hai Israel: Tuhan Allah kita adalah Tuhan yang esa; engkau harus mengasihi Tuhan, Allahmu, dengan segenap hatimu, dan dengan segenap jiwamu, dan dengan segenap kekuatanmu."
Panggilan untuk mengasihi ini mengajak kita untuk memupuk hubungan dengan Allah yang mendalam, tulen, dan transformatif.

Warga Kristian yang menyatukan kematiannya dengan kematian Yesus, menganggap kematian sebagai pertemuan dengan Yesus dan sebagai langkah masuk ke dalam kehidupan abadi.

(KKG, 1020)



Ayat Suci
Minggu ini:

Ulangan 6: 2-6

Mazmur 17: 2-4, 47, 51

Ibrani 7: 23-28

Markus 12: 28-34

Apabila ahli Taurat bertanya kepada Yesus, "Hukum manakah yang paling utama?". Yesus menjawab dengan panggilan untuk mengasihi dengan menghubungkan kasih Allah dengan kasih sesama. Ini adalah jenis komitmen kasih yang Yesus minta daripada kita. Mengasihi Allah bukan sahaja memanggil kita untuk mengingati kehadiranNya dalam hidup kita, tetapi juga mendorong kita untuk merenung bagaimana kasih ini dimanifestasikan dalam interaksi kita dengan orang lain. Ajaran Yesus membimbing kita kepada kebenaran yang lebih mendalam: kasih itu adalah inti iman kita. Kasih ini memaksa kita untuk bertindak adil, menunjukkan belas kasihan, dan mencari kesejahteraan orang lain.

Maka, kita perlu bertanya kepada diri sendiri, adakah kita menghulurkan sokongan atau bantuan kepada golongan yang memerlukan di KED atau kawasan kejiranan kita? Bolehkah kita, mungkin membawa salinan buletin paroki atau Herald kepada orang tua atau orang yang tinggal di rumah atau menawarkan kata-kata penghiburan kepada seseorang yang kehilangan orang tersayang atau menyertai doa 7 hari. Menjadi umat tetap ke Misa Hari Minggu tetapi menutup mata kepada keperluan jiran kita adalah setara dengan menghidupi separuh daripada Injil hari ini.

Semasa kita merenungkan hubungan antara mengasihi Allah dan mengasihi sesama, kita diingatkan bahawa iman kita dihayati dalam masyarakat. **Kita dipanggil bukan sahaja untuk mengasihi secara teori tetapi untuk menjelmakan cinta dalam cara yang praktikal.** Ini adalah seruan untuk bertindak yang boleh mengubah kehidupan kita dan dunia di sekeliling kita. ✦